

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- 1- उपराज्यपाल मनोज सिन्हा होरें सेहत ते मेडिकल शिक्षा मैहकमे दी जायजा बैठक दी अध्यक्षता कीती।
- 2- पुलस महानिदेशक आर.आर स्वैन होरें रामबन जिले च खारी, संगलदान रेलवे स्टेशनें दा दौरा कीता ते इनें नमें स्टेशनें पर सुरक्षा उपाएं दा जायजा लैता।
- 3- प्रधानमंत्री नरेंद्र मोदी होर कल्लै थमां द'ऊं दिनें दे भूटान दौरै पर जा'रदे न, दौरै दा मकसद दौनें मुखें बशकार सरबंधें गी निग्गर बनाना ऐ।
- 4 शारीरिक चुनौतिएं दा सामना करा'रदे या 85एं ब'रें कोला उप्परली बरेसू दे डेढ लकख कोला मते मतदाता अपने घरें दा गै वोट पाई सकडन। एहदे लेई अपनी इच्छेया दस्सने पर चुनाs कर्मी आपूं उंदे घर जाइए वोट पोआडन।

LG-Meeting

उपराज्यपाल मनोज सिन्हा होरें सेहत ते मेडिकल शिक्षा मैहकमे दे वरिष्ठ अधिकारिणं ते सरकारी मेडिकल कालेज दे प्रिंसीपलें दी बैठक लाई ते चला'रदे कम्में दी कारकरदगी दा जायजा लैता। उपराज्यपाल होरें अफसरें ते सारे सरबंधी धड़ें गी सारें लेई नरोई सेहत पर ध्यान केंद्रित करने लेई गलाया। उनें सब्बनें लेई बेहतर कारगर ते असरदार सेहत सेवा लोकें दी पुज्ज अंदर

उपलब्ध करोआने पर जोर पाया। उनें सरकारी मेडिकल कालेज ते होरनें महत्वै आले सेहत इदारे ते ढांचागत परियोजनाएं दी प्रगति ते चलाई जा'रदी स्कीमें दा जायजा लैता। उपराज्यपाल होरे आयुष्मान भारत, पी.एम.जे.ए.वाई सेहत कार्ड दा इस्तेमाल सरकारी अस्पतालें च बदाने पर बी जोर पाया। उपराज्यपाल होरे अस्पतालें, नीम डाक्टरी ते नर्सिंग कालेज च मनुकखी संसाधनें दा बी जायजा लैता। उनें हिदायत कीती जे स्किम्स च खाली पेदी असामिएं गी जे.के.एस.एस.बी ते लोक सेवा आयोग गी पुर करने लेई भेजी दिता जा।

<><><><><><>

LG-University

उपराज्यपाल मनोज सिन्हा होरे जम्मू यूनिवर्सिटी आस्सेआ आयोजित गूज 2024 उत्सव दे उद्घाटनी सत्र गी संबोधित कीता। इस उत्सव दा मकसद अपनी बन्न-सबन्नी संस्कृति दा जशन मनाना, शिक्षा इदारे गी उंदी समर्थ दस्सने दा मौका उपलब्ध करोआना ते प्रदेश च शिक्षा सरबंधी ढांचें गी तगड़ा बनाने च जोगदान देना ऐ। सिन्हा होरे विद्यार्थिएं गी उंदी रचनात्मकता ते हुनर दस्सने लेई इक अनोखा मंच उपलब्ध करोआने गिते जम्मू यूनिवर्सिटी दे जत्नें दी सराहना कीती। एल.जी होरे होरनें यूनिवर्सिटिएं ते शिक्षा इदारे दा आह्वान कीता जे ओह जम्मू यूनिवर्सिटी दिएं महत्वपूर्ण पैहलकदमिएं जियां डिजाइन यूअर, डिग्री, कालेज ऑन व्हील्ज ते गूं प्रोग्राम दा अनुसरण करन कीजे इस किस्में दे कार्यक्रम विद्यार्थिएं अंदर रचनात्मकता पैदा करने ते जिंदगी च किश नमां करने ते सिक्खने लेई प्रेरित करने च बड़े कारी दे साबत होआ करदे न।

<><><><><><>

DGP-R-R Swain

पुलस महानिदेशक आर.आर स्वैन होंरें रामबन जिले दे खारी ते संगददान च कायम नमें स्टेशनं दे दौरा लाइए सुरक्षा इंतजामें दे जायजा लैता। उनें रेलवे पुलस ते सरबंधी पुलस अफसरें कन्नै गल्लबात कीती। उनें रेलवे स्टेशनं दे किश हिस्सें दे निरीक्षण बी कीता। उनें रेलवे दे वरिष्ठ अफसरें कन्नै गल्लबात कीती ते दिती जा रदी सहूलतें दे जायजा लैता। अपने दौरे दौरान डीजीपी होंरें सुरक्षा सरबंधी नियम कायदें गी बदाने, यात्रुएं दी सुरक्षा ते सार्वजनिक संपत्ति दी सुरक्षा यकीनी बनाने लेई बी गलाया।

<><><><><><>

PM Modi Bhutan

प्रधानमंत्री नरेंद्र मोदी कल थमां भूटान दी द'ऊं रोजा राजकीय यात्रा पर जाडन। यात्रा दौरान प्रधानमंत्री भूटान दे राजा, जिंग्ये खेसर नामग्याल बांगचुक ते भूटान ते चौथे राजा जिम्ये बांगचुक हुंदे नै मलाटी करडन। ओह् अपने भूटानी समकक्ष शेरिंग टोबगे हुंदे नै बी गल्लबात करडन। विदेश मंत्रालय नै आखेआ ऐ जे यात्रा भारत ते भूटान बश्कार नियमित उच्च स्तरीय आदान-प्रदान दी परंपरा ते सरकार दी गुआंडी पैहले नीति पर जोर देने दे मताबक ऐ। एहदे च आखेआ गेआ ऐ जे भारत ते भूटान इक अनौखी ते टिकाऊ सांझेदारी सांझा करदे न जेड़े आपसी सूझ-बूझ ते सद्भावना दी बुनियाद पर न। विदेश मंत्रालय नै आखेआ ऐ जे सांझा आध्यात्मिक विरासत ते लोकें बश्कार मधुर सरबंध, भारत ते भूटान दे असाधारण रिश्ते च गहराई ते जीवंतता जोड़े न। एहदे च आखेआ गेआ ऐ जे एह् यात्रा दौनें पक्खें दे हितें दे दपक्खिया ते इलाकाई मामलें पर विचारें दे आदान-प्रदान करने ते दौनें मुखें दे लोकें दे

फायदे लेई मिसाली सांझेदारी गी बदाने ते रफ्तार देने दे तौर-तरीके पर सोच-विचार करने दे मौके प्रदान करोग।

<><><><><><>

UPSC-Exam

संघ लोक सेवा आयोग नै सिविल सेवा दे प्री-लिमिनरी मतेयान 2024 गी स्थगित करने दा फैसला लैता ऐ। सिविल सेवा दे एह मतेयान जेड़े भारती वन सेवा परीक्षा 2024 आस्टै स्क्रीनिंग टेस्ट दे तौर पर बी कम्म करदा ऐ, हून इस बरे 16 जून गी होग। एह मतेयान पैहले इस बरे 26 मई गी लैते जाने हे।

<><><><><><>

Ramban-Reorientation

रामबन च आयुष मैहकमे आस्सेआ मेडिकल अफसरें ते नीम डाक्टरी अमले लेई योग बारै लोआए गेदा विशेष जागरूकता ते निर्देशन कार्यक्रम कल कामयाबी कन्नै सम्पन्न होई गेआ। जिले दे योग सरबंधि तालमेल ते नोडल अफसर डा. मसूस इकबाल जरगर होरें योग ते कन्नै विशेष जड़ी बूटिएं दे बारै च प्रतिभागिएं गी जागरूक कीता। इस कार्यक्रम दा मकसद सेहत सेवाएं कन्नै जुड़े दे माहिरें ते नीम डाक्टरी अमले गी योग अभ्यास ते योग तैहत इलाज दिएं विशेष पद्धतिएं बारै जानकार बनाना हा।

<><><><><><>

Voting Facilities

औंदे लोकसभा चुनाएं दरान जम्मू-कश्मीर च डेढ लक्ख शा मते दिव्यांग ते 85एं बरें शा मती उम्मी दे बुजुर्ग मतदाता घरै थमां गै वोट पाने दी सुविधा दा लाह् ठोआई सकडन। आकाशवाणी दे जम्मू संवाददाता मुजब प्रदेश च 40 फीसद शा मती दिव्यांगता आहले 77 जहार 613 दिव्यांग ते 85एं बरें शा मते दी उम्मी दे 77 जहार 45 बुजुर्ग मतदाता न। औंदे लोकसभा चुनाएं दौरान जेगर इनें मतदाताएं दी सेहत ठीक नेई हुंदी यां इनेंगी जेगर कोई होर मजबूरी हुंदी ऐ तां ओह् घरै थमां गै वोट पाने दे अपने इक्क दा इस्तेमाल करी सकदे न। चुनां आयोग नै पैहली बारी इनें द'ऊं किस्मै दे मतदाताएं लेई एह् सुविधा उपलब्ध करोआई ऐ।

<><><><><><>

Samba Election

जिला प्रशासन सांबा नै चुनावी अमले गी जरूरी कौशल ते जान कन्नै लैस करने लेई सिखलाई आली इक कार्यशाला दा सरिस्ता कीता तां जे औंदे लोकसभा चुनाएं दरान अपनी जिम्मेदारिएं गी खरी चाल्ली तोढ़ चाढ़ी सकन। कार्यशाला दरान आदर्श आचार संहिता दी निगरानी दे कम्मै आली बक्ख-बक्ख टीमै गी उंदी भूमिका ते जिम्मेदारिएं बारै जानकार बनाया गेआ। जिला चुना अधिकारी अभिषेक शर्मा हुंदी अगुवाई आले इस सिखलाई सत्र दौरान मास्टर ट्रेनरें, इलेक्ट्रिक वोटिंग मशीनें सरबन्धी महत्वपूर्ण जानकारीयां उपलब्ध करोआइयां।

<><><><><><>

Doda-Election Meeting

औंदे लोकसभा चुनाएं दे मद्देनजर प्रिट ते इलेक्ट्रिक मीडिया दी भूमिका ते जिम्मेदारिएं पर चर्चा लेई जिला सूचना केंद्र डोडा च मीडियाकर्मिएं कन्नै गल्लबात आहली इक बैठक दा

सरिस्ता कीता गेआ। इस मौके पर मीडियाकर्मिणं गी चुनाणं दरान उंदी जिम्मेदारिणं ते उद्देश्ये
बारै जानकार बनाया गेआ। डोडा दे जिला सूचना अधिकारी होरें आखेआ जे मीडिया स्हाड़े
लोकतंत्र दा इक अहम हिस्सा ऐ। डोडा जिले च कम्म करै करदे प्रिंट ते इलेक्ट्रनिक मीडिया दे
संवाददाताणं ते रिपोर्टरें इस बैठक च हिस्सा लैता।

<><><><><><>

Elections Meet

किश्तवाड़ दे जिला चुनांस अधिकारी डाक्टर देवांश यादव होरें आँदे लोकसभा चुनाणं दे
मद्देनजर भारती चुनां आयोग आस्सेआ जारी हिदायतें ते आदर्श आचार संहिता च दस्से गेदे
मानदंडें गी बरकरार रक्खने दे महत्वै पर लो पाने लेई बक्ख-बक्ख सियासी पार्टिणं दे मेदवारें
कन्नै बैठक लाई। एहदा मकसद सियासी पार्टिणं गी चुनावी प्रक्रिया दरान निरपक्खता ते
पारदर्शिता बरकरार रक्खने बारै जागरूक बनाना ऐ। इस दौरान जेहड़े महत्वपूर्ण विशें पर
गल्लबात कीती जिंदे च आदर्श आचार संहिता दे प्रावधानें दी पालमा, मीडिया इश्तेहारें ते
चुनां प्रचार लेई इस्तेमाल होने आली गइडिणं गितै जरूरी इजाजतां ते होर दुए महत्वपूर्ण पैहलू
शामल हे।

<><><><><><>

LS Poll Notification

लोकसभा चुना दे पैहले गेइ दे मतदान लेई अधिसूचना कल जारी कीती जाग जेदे तैहत 17
राज्यें ते 4 केंद्र शासित प्रदेशें च 102 लोकसभा सीटें लेई 19 अप्रैल गी वोट पोआए जाडन।
इनें 102 सीटें चा 39 तमिल नाडू, 12 राजस्थान, 8 उत्तर प्रदेश, 6 मध्य प्रदेश, 5-5 सीटां
उत्तराखंड, असम ते महाराष्ट्र च, 4 बिहार, 3 पच्छिम बंगाल, अरुणाचल प्रदेश, मणिपुर ते

मेघालय च 2-2 ते 1-1 सीट छतीसगढ़, मिजोरम, नागालैंड, सिक्कम, त्रिपुरा, अंडमान-निकोबार, जम्मू-कश्मीर, लक्ष्मीप ते पुद्दुचेरी च न। 2024 दे लोकसभा चुनांस च कुल 7 गेड़ें च करोआए जा करदे न। वोटें दी गिनतरी 4 जून गी कीती जाग।

<><><><><><>